

**Dissertatio de spuria graviditate : quam in almâ Facultatis Medicae
Parisiensis aulâ proposuit atque tueri conatus est, die [2a] mensis [7bria]
anno 1881 / J. Capuron.**

Contributors

Capuron, Joseph, 1767-1850.
Royal College of Surgeons of England

Publication/Creation

Parisiis : E typis Crapelet, 1811.

Persistent URL

<https://wellcomecollection.org/works/q838w4yy>

Provider

Royal College of Surgeons

License and attribution

This material has been provided by The Royal College of Surgeons of England. The original may be consulted at The Royal College of Surgeons of England. where the originals may be consulted. This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection
183 Euston Road
London NW1 2BE UK
T +44 (0)20 7611 8722
E library@wellcomecollection.org
<https://wellcomecollection.org>

AD PUBLICAM DE OBSTETRICII PALMA ÆMULATIONEM.

DISSERTATIO DE SPURIA GRAVIDITATE,

*Quam in alma Facultatis Medicæ parisiensis aulâ
proposituit atque tueri conatus est,*

Die 2^o mensis ~~Febr~~ anno 1811,

J. CAPURON, Doctor-Medicus Parisiensis.

PRESENTED
W Park

PARISIIS,
E TYPIS CRAPELET.

1811.

DISSEMINATIO

STATUTARIA ET CIVILIA DE SPURIA

Præses, D. DE JUSSIEU.

LE ROUX.

A. LE ROY.

CHAUSSIER.

Judices, DD. A. DUBOIS.

BOURDOIS.

EVRAT.

Succedanei, DD. LALLEMENT.

RICHERAND.

AUVITY.

DISSE

R T A T I O

DE SPURIA GRAVIDITATE.

QUID spuria graviditas? Ea procul dubio melius per negationem quam per affirmationem definiri potest: quippe quæ, genuinâ quam simulat absente graviditate, adsit. Neque tamen hanc et illam itâ oppositas credas, ut unâ sublatâ ponatur altera, quandoquidem sâpe neutrius, aliquando utriusque causa, in muliere reperiatur.

Cum genuina graviditas adest, unicus pluresve foetuli in utero aut extrâ uterum existunt; sin minus spuria sit, in hoc organo nihil aut quædam continentur substantiæ quæ fucum facere et peritissimas etiam obstetrices fallere possunt. Cui verò errori tunc ansam præbent variæ uteri, aut ejus appendicum, aut abdominis mutationes. Unde tria spuriæ graviditatis genera quæ triplici articulo exponere conabimur.

GENUS PRIMUM.

De spuriis, quæ ab uteri mutatione, graviditatibus.

Uteri mutatio vel a conceptu pendet, vel ipsi aliena est. Ad priorem mola, ad posteriorem aqua, hydatidæ, sanguis, aer, polypi, hysteria, scirrhomaque respiciunt. De quibus infrâ totidem sectionibus.

SPECIES PRIMA.

De spuriâ, quæ a mola, graviditate.

Mola dicitur substantia quædam carnea, informis, sensûs expers, aliquatenus organica, vegetabili tantum vitâ prædita, quæ in utero crescit, eoque tandem expellitur.

Quæcumque apud auctores nonnullos, vulgus et mulierculas, de

illius substantiae origine et proprietatibus facta pervagantur commenta, haec inter aniles fabulas, chimericasque hypotheses recensenda atque sterili tantum disputationi tradenda sunt.

Solus autem inter neotericos sanioris mentis esse videtur celebrimus *Levret*, qui molae generationem a depravato foetuli germine pendere existimat. Quâ positâ quidem opinione, varia molae phænomena, tanquam ex unico fonte derivantur: scilicet ipsius nunc ad placentam, nunc ad gallinaceorum stomachum similitudo, mollities aut durities, humiditas aut siccitas, formae varietas, unitas aut pluralitas, cum genuina graviditate complexio, major minorve cum utero adhaesus, in juvenculis vetulisque frequentia, in ætate media raritas, cum foetuli fragmentis, ossiculis, etc. commixtio, cavitas meninge obducta, plerumque humore plena, aliquando vacua, hæmorrhagia uterina, etc.

Hinc discrimen expulsam molam inter et sanguinis coagulum, et uteri scirrhoma quocum ab Aetio et Æginetâ confundebatur, et polypum qui a nonnullis nutritionis mola salutatur, et tumorem flatulentum, et vesiculam hydatigenam.

Si quibusdam scriptoribus fides, spuria, de quâ nunc, graviditas a genuinâ facillimè distinguitur. Verumtamen haud ita sentiunt practici quos in utrâque supprimi menstrua, solitos fastidiri cibos aut depravatos appeti, turgere mammas et abdomen, variasque circulationis, respirationis, digestionis, etc. anomalias concomitari minimè latet.

Neque majorem certitudinem faciunt quæ ad graviditatis usque metam progrediuntur incommoda, mammarum collapsus, latex serosus papillis emanans, non complanatum primis mensibus hypogastrium, regularis uteri globus, ipsiusque ad latéra aut pubem versus mobilitas. Hæc enim non molae propria, verùm et genuinæ graviditati aliquando communia memorantur.

Quænam igitur tenenda via ut vitetur errandi periculum? Explorandi-ne foetuli motus? Genuinam quidem hi graviditatem indicant, cum a prægnante aut obstetricice percipiuntur; verùm quis molam in utero existere asseverare audebit, etsi motus supradictos non sentiat? Nonne mulieres robustos aliquando pepererunt infantulos quorum nullam toto

gravitatis curriculo conscientiam habuerant? Quinimò, cum molæ utero gererentur, non semel spastici abdominalium viscerum sub-sultus pro fœtulorum motibus habitu sunt. Tandem cuinam tanta fuit obstetrici in digito solertia, ut molam fœtulo contiguam et quasi consanguineam distingueret?

Quantâ igitur cautelâ de investigandâ graviditate negotium suscipienti opus sit, nemo non videt. Cum autem semper in dubiis tutior pars eligenda sit, ideircò donec plures post solitum partū terminum menses elapsi fuerint expectandum est, ne turpis atque periculosus admittatur error.

Neque adeò pertimescendam molæ in utero habitationem credas; quippè quæ ultrà anni spatium, salvâ et integrâ muliere, prorogari possit. Errarunt igitur auctores qui tunc mortem pseudo-gravidis semper imminere existimarunt.

Hinc temeritatis criminē redarguendi sunt qui præmaturè aut intempestivè phlebotomiâ, vomitoriis, drasticis, echolicis, sternutatoriis, etc. molæ expulsionem sollicitant.

Laudanda verò eorum praxis qui hanc solis uteri viribus functionem committunt, ipsi tamen properum, si opus est, adjutorium datur. Tunc autem genitalia, præsertim uteri cervicem generali aut locali balneo, sumigio, tepidâque injectione relaxare plurimum confert. Si haemorrhagia, convulsio aut syncope acciderit, mola manu aut instrumento extrahenda est. Quæ si perseveraverint, ad eadem quæ post naturalem fœtūs aut secundinarum expulsionem auxilia recurrendum erit. Caveas imprimis ne pseudo-prægnans cùm sanguine vitam amittat: quamobrem vehementer excitanda uteri contractio, ut angustiores vasorum canaliculi tardiorem pretioso hinc latice moram faciant.

S P E C I E S S E C U N D A.

De spuriâ, quæ ab hydrometriâ seu uteri hydrope, graviditate.

Unde aqua in uterum? An a depravato fœtuli germine? An ab abdominali hydrope per tubas fallopianas? An ab adauctâ exhalatione aut

imminutâ resorptione ? An denique a kysti generatione unde postea seri excretio ? Sed hæc ad eos quos vana mordet cavillandi aut disputandi prurigo.

Mulieres , rarius quidem vigente , sæpius verò languente aut abolitâ fæcunditate , hydrometriæ obnoxias esse neminem parumper in arte versatum fugit. Qui verò morbus lentius ociusve progredi , magis minusque invalescere solet : inde variæ uteri , hypogastrii , totiusque abdominis mutationes. Si Skenkio fides , mulier quædam , mirabile auditu ! centum et octoginta seri libras utero gerebat.

Hanc igitur spuriæ graviditatis speciem a genuinâ distinguere plurimi interest. Verùm hoc opus , hic labor , non quidem theoreticis quorum lingua vel intricatissimas quæstiones enodat , sed practicis quorum manus sexcentis plerumque difficultatibus irretitur. Quapropter obstetricices celerius hâc de re judicare non oportet.

Atqui profectò , saltem ineunte morbo , haud facile declinatur error ; quippe quod eadem tunc , sed incerta aut æquivoca tum genuinam cum spuriam graviditatem signa concomitentur ; utrinque enim major uteri moles , gravitas , uterinæ cervicis et orificii mutatio , incommoda , molestiæ , etc.

Ergo dum lux fiat expectare oportet. Tenebræ autem quarto quintove circiter mense dissipari solent. Tunc quidem temporis moveri fœtum , si mulier prægnans , prominere et antrorsum acuminari hypogastrium , turgere et consolidari mammae ; quæ omnia prorsùs exulant , cum serosi laticis collectio genuinam* graviditatē mentitur. Hauc enim indicant fluctuatio , uteri mollities et gravitas , sphærica ejus forma , mammarum collapsus , siccitas , marcor , etc.

An verò facilis idiopathicam inter et symptomaticam hydrometriam distinctio ? Quædam-ne liquidum kysto aut uteri cavo tantùm , cum vel sine fœtulo , contineri indigitant ? Respondeant practici.

Supradicti autem hydropis , quæcumque sit natura aut indoles , rarò cum bonis ægræ rebus existere videtur. Nisi enim semper , plerumque saltem generationi obstat , sive fœtum corruptat , sive ejus maturitatem retardet aut impedit.

Si fluctuantí liquido viam aperiant, mox recidivæ ejus collectioni obviam eant obstetrices, tota duplice hoc cardine volvitur morbi curatio. Ad primum, uterinæ cervicis relaxatio per balnea, fomenta, fumigia, injectiones; quæ nisi satisfaciant, orificio dígito cautè dilatare oportet; id, si membrana obturaverit, perforator aut lacerator. Ad secundum, tonica et astringentia, eaque ingesta vel injecta, cibus validus, meracum, exercitatio, insolatio, martialia, etc. quæ totam mulieris œconomiam et uteri substantiam roborandi vim habent.

Morbus anterior, generalis aut particularis, unde mali labes, idoneâ medelâ impugnandus est.

SPECIES TERTIA.

De spuriâ, quæ ab uterinis hydatidis, graviditate.

Si quis de nidulantibus in utero hydatidis dubium aut controversiam moveat, hunc ad practicorum observata confugere oportet. Quæ si attentè legerit, supradictis sanè bestiolis aut vermiculis obnoxias quidem juvenculas et virgines, adultas verò mulieres et matres-familias, præsertim labente jam ætate et desinente menstruorum fluxu, obnoxiores esse persuasum habebit.

Undenam hydatidarum origo? Qnamvis non unica assignari soleat, veram tamen, nisi ex ingenitâ accidentalive uteri atoniâ, nos ignorare non diffitemur. Sed tantam non nostrum litem componere; de quâ fusius apud naturæ indagatores.

Pluris autem intererit, si prædicta animalcula inter et fœtulum cuius in utero præsentiam simulant discriminem exposuerimus. Quod profectò quam arduum sit, norunt omnes, nisi bonæ fidei valedixerint. Hic enim fluctuatio obscura aut nulla; mulier a morbi initio eadem aut plurima quæ prægnans patitur incommoda. Quantâ igitur calliditate opus est? Quibusdam tamen in casibus serum et sanguis, vel a secundo ad ultimum usque graviditatis mensem, alternis vicibus, crebrius rariusve e genitalibus fluere; insuper os uteri non connivere, neque mutari, hiare verò eandemque formam et situm conservare a clarissimo professore

Percy observatum est. Hinc major hydatidarum probabilitas quæ certitudinis gradum obtinet, omneque semovet errandi periculum, si hydatigenæ vesiculæ, animatæ aut inanimatæ, discretæ aut conjunctæ, ribesii ramusculo aut uvæ racemo similes vulvâ egrediantur.

Quæ animacula quidem non semper in utero hospitari, sed inde ocius tardiusve, a primo ad decimum mensem, solis naturæ viribus expelli solent. An igitur expectandus ille morbi terminus? Minimè quidem, si de hydatidarum præsentia constiterit; mulier enim hæmorrhagiæ, syncopes et vitæ quam posset cum sanguine fundere, discrimen adiret, præsertim, si mola vesicularis divisa non integræ excluderetur. Tunc igitur uterum instimulare oportet ut tam molestos hospites foras ire cogat. Quamobrem muriatis sodæ solutio, aquave marina acetô permixta, in uterum injicitor: quibus profectò nihil efficacius comprobavit experientia.

SPECIES QUARTA.

De spuriâ, quæ ab uterino hæmatope, graviditate.

Plurima passim apud auctores enarrantur exempla mulierum quæ se gravidas existimabant, cum majorem minoremve sanguinis quantitatem utero gererent. Hinc spuriæ graviditatis species cui obnoxiae membrantur etiam virgines aut innuptæ juvenculæ quarum vagina meninge occluditur, pueræræ quibus uteri orificium fortuitò obseratur, aut vicinis partibus accrescit, denique vetulæ, cum jam ad extremam fæcunditatis menstruorumque periodum ventum est.

Quæ cum itâ se habeant, vana aliquandò fiduciâ per consuetum graviditatis spatium deludi solent mulieres. Tunc quidem pedetentim, celeriori lentiore gradu, hypogastrium intumescere, corrotundari, minimè tamen dolere, molestari verò tantùm aut fatigari lumbos, inguina, femora. Intereà nulla vel obscura liquidi fluctuatio ob facilem sanguinis coagulationem, sed phænomenorum quolibet mense redditus et exasperatio; quo enim tempore menstrua fluere solebant, tumorem repente crescere, stare verò per intervalla.

Quæ profectò signa, si insuper nulli appareant fœtuli motus, mulieris-que sanitas, ut fieri solet, in pejus vertatur, pathognomonica habenda sunt, atque spuriam de quâ nunc graviditatem a genuinâ secernunt.

An uterus tantâ sanguinis copiâ infarciri atque distendi, ut contrac-tilitatem amittat; an et hujus inertiae causâ mulieri lumen prius adimi possit quâ manus ipsi tendatur auxiliatrix? Quod certò quam ingenitis supradicti organi proprietatibus absonum videatur nemo non sentit, nisi penitus obstructum illius orificium insuperabilem sanguini moram faciat. Tunc autem uterus vehementer enixus et conquassatus in pelvim imò ad vulvam usque protruderetur naturalemque partum simularet.

Hinc naturæ velociter adjuvandæ necessitas liquet: emollienda tunc uteri cervix, reserandumque orificium; si balnea, fumigia, injectaque non sufficient, digitæ, cautæ tamen, admovendi sunt; denique si os uteri impervium fuerit, pars cætera vaginæ contigua incidenda est; hæc autem ad chirurgiam operatio quam hîc describere alienum et pro-líxius esset.

S P E C I E S Q U I N T A.

De spuriâ, quæ a physometriâ, graviditate.

Physometria seu uterina tympanites vulgò duplex; alia quidem vera cum uterus, folliculi instar, aere inflatur, alia verò spuria, cum hoc organo flatus eructari solent.

Aer-ne in prædicti organi cavo generari, an foris in ipsum irruere? Utriusque, si veritati consonat, causa tamen differt. Hinc enim oris uterini dilatatio, cinguli quo circumdari puerarum abdomen, lin-teorumque vulvæ, dum catamaenia aut menstrua fluunt, apponi solitorum omissio; illinc spastica uterinæ cervicis constrictio, aut per membranam occlusio; utrinque verò organi atonia et defectio.

Vera physometria majori minoriye, levi, circumscripto, uniformi, so-noroque hypogastrii tumore, lumborum, inguinum, femorumque moles-tia, dolore, desidendi miögendique difficultate indicatur; spuriam verò,

invitâ etiam muliere , uteri latratus , seu flatulenti sonorique ructus proclaimant.

Prior tamen sola est quæ genuinam graviditatem molamve mentiri incautosque fallere possit. Verum discriminem parumper attendantis cuiuspiam pungit oculos ; tumor enim levis , resonans , immobilis , et circumscriptus aerem , non molam quæ gravis est , neque a fortiori fœtulum qui certo tempore moveri solet , significat.

Neutra autem tympanitæ varietas insausti ominis est , nisi ab anteriori gravissimoque morbo pendeat , quod non frequenter accidit. Prior tamen effœtam , saltē ad tempus , mulierem facere , posterior verò verecundiam incutere , non mortem afferre potest : hâc enim affectæ nihil verentur magis quam si ab adstantibus ructantis uteri vox audiatur.

Quapropter veræ tympanitæ , reserato uteri orificio , medendum est , ut flatus quæ data porta ruant. Quem scopum attinent supradicta ubi de uterino hydrope remedia , balnea , fumigia , incisio , etc.

Quo facto , si venti in carcere remaneant , vi foras expellendi sunt. Tunc autem vomere alii , alii verò purgari mulierem volunt ; quibusdam exercitatio saltatioque placent ; sunt etiam qui introductum per os uteri specillum malunt. Optima verò quæ nobis videtur methodus ea est , ut , dum alterâ manu comprimitur et in angustum premitur organum , ipsius orificium alterâ reseretur. Tandem exclusi aeris non secūs ac serosi laticis in uterus regressus intercluditur.

S P E C I E S S E X T A .

De spuriâ , quæ ab uteri polypo , graviditate.

Uteri polypus dicitur ex crescentia carneâ , sensu carens , densitate , mole , longitudine coloreque varia , unico solùm crassiori tenuiorive pediculo organi cavo insita.

Cujus causa ab omni stimulo internam uteri superficiem irritante oriri solet ; culpari igitur possunt veneris abusus , manustupratio , leucorrhœa diutius prorogata , lues syphilitica , herpetica prurigo , obstetricium ,

ulceratio , menstruorum aut lochiorum acrimonia , mutatio quæ a tempore , ut aiunt , critico .

Non mirum ergò quod vegetatio id genus , sterilem et fæcundam , impuberem et adultam , nuptam et innuptam , juvenem et vetulam afficiat .

Si fides observatoribus , excrescentiæ pediculus anticæ aut posticæ uterinæ cavitatis superficieï , lateribus , fundo , cervicisque cavo , rarius orificio inseri potest .

Polypi autem profundè insiti initia parum aut nullatenus incommoda , vix suspecta , obscura , prorsus incognita .

Progrediente verò aut crescente morbo , uteri molestia , gravitas , distentio , ideoque contractio , et in importunum hospitem reactio ; inde continuaus aut intermissus hypogastrii dolor , lumborum , inguinum , femorumque gravitas , uteri prolapsus , mucosa , puriformis , sanguinolenta , parca vel copiosa excretio , major aut minor mulieris debilitas , exinanitio , syncope , aliquando mors , nondum detectâ morbi causâ .

Remollitâ autem uteri cervice , alia apparere phænomena . Compresus enim undequaque tumor orificium subit , cunei instar dilatat , mox in vaginam prominet . Quo tempore explorator index tuberculum tangit gibbosum , levigatum , renitens , sensùs expers , solidoque circumbatum annulo , sub quo distinctus a vaginæ fundo sulcus reperitur . Deinde minor uteri distentio , mitioraque incommoda . Tum superficialia polypi vascula constringi , lacerari ; mucus sanguisque fluere ; languere , debilitari , marcescere , tandemque anteà perire mulier quam opportunum ipsi feratur auxilium .

Prolabente verò in vaginam polypo , recti , vesicæ , urethræque compressio , desidendi , mingendique difficultas , continuus molestissimusque gravitatis sensus .

Denique , protruso extrà vulvam tumore , facilior quidem lotii et excrementorum ejectio , major verò uteri prolapsus , aliquando inversio , acutus inguimum , iliorum , lumborumque dolor .

Perobscura igitur recens vegetantis et adhuc utero retenti polypi diagnosis ; tunc enim genuinam simulare potest graviditatem quâcum

etiam haud incompatibilis est , nisi utrique tuborum origini accreverit. Quinimò , polyposas excrescentias in vaginam prolabi incipientes in uteri cavum , superveniente graviditate , regressas ibique ad partum usque abditas memorant. Neque clariorem facem præbet mucosi , puriformis aut sanguinolenti liquidi fluxus ; quippe qui non polypum magis quam molam indicet.

Aliter tamen se res habet , cum tumor uteri orificio subit atque in vaginam delabitur ; tunc enim quæ anteà tenebrosa luce meridianâ clarior differentia extra dubitationis aleam ponitur. Verùm polypus eò usque progressus , nisi cum graviditate aut molâ , saltem cum uteri inversione aut procidentiâ adhuc confundi potest ; sed hæc ad chirurgiam , non ad obstetricium.

Ex dictis liquet quot et quām sinistri casus mulieri , supradicto uteri morbo affectæ immineant. Quos ut averterent *Celso* polypum urere , *Fabricio ab Aquapendente* secare , quibusdam tordere placuit. Quibus omnibus utpote periculi plenis , recentior anteponenda ligatura , quæ naturæ imitatrix , maximam inventori *Levret* , non mediocrem emendatori *Desault* laudem fecit.

SPECIES SEPTIMA.

De spuria , quæ ab hysteria , graviditate.

Apud hystericas nervosasque mulieres affici aut mutari uterum plusquam sexcentis observationibus compertum est. Hocce igitur est quam obrem vana tunc graviditatis , imo etiam futuri partûs spes affulgeat. Quâ de erroris specie diarium DD. *Corvisart , Leroux et Boyer*. Vent. an. IX , pag. 471.

Spuriam verò graviditatem plerumque indicare solent turgida mammarum moles , albidi laticis excretio , abdominis uterique extensio , menstruorum fluxus aut suppressio , internique motus quibus deludi quidem mulieres haud mirum est , hallucinari verò obstetrices et a fortiori medicos , interjecto saltem tempore , pudere debet.

Cauti ergò sunt quicumque obstetriciam artem exercent ne in tur-

pissimum errorem incident; quem profectò fugient, si abdomini alteram, alteram verò uterinæ cervici manum admoveant, rem sedulò exploraturi. Tunc quibus non obcæcata sed sana mens erit, his nudum fucique insciūm veritatis lumen exorietur. Namque in hystericā aut nervosā graviditate tumet quidem sed mollescit et aliquandò repente detumescit abdomen; contrà in prægnantibus tumor renitet, perseverat, sensimque ad fœtuli maturitatem usque augetur. Illinc anomala uteri mutatio, moles solito major quandoque minor, convulsivi abdominalium musculorum, viscerum, genitaliumque motus; hinc uteri continua, plus plusque crescens uteri extensio, tandem, absolutis quatuor aut quinque mensibus, quidam peritis haud ignoti motus qui præsentem vivumque fœtum indicant.

Quæ spuriæ graviditatis species brevior aut diuturnior, ante præfixum partū terminum, absolutis plerumque novem mensibus, vulgo clauditur. Aliquandò tamen ad plures annos usque perennare memoran. Sponte verò resolvi aut antihystericis curari solet.

SPECIES OCTAVA.

De spuriâ, quæ ab uteri scirrhomate, graviditate.

Hic per uteri scirrhoma intelligere juvat, tumorem majorem aut minorem, renitentem, durum, inæqualem, non dolentem, plerumque stationarium, sæpiissime in cancerum vergentem; qui multiplici causâ, nimis ingenitâ quâdam, ut aiunt, diathesi, lue venereâ, scrophulis, etc. crebriori coitu, obstetricio, abortu, leucorrhæâ aut metritide acutâ vel chronicâ, menstruorum anomalâ aut depravatione, tristí præsertim animi pathemate generari solet.

Uteri scirrhoma ulceris-ne causa an effectus? Fibrosa-ne organi substantia, an mucosa ejus membrana prima mali sedes et origo? Hæc non ad nos, sed ad autopsiæ peritos.

Quidquid id est, tumor quilibet quo mutatur uteri moles aut struc-tura genuinam graviditatem saltem ab exordio simulare et incertos fallere potest. Res autem per antecedentia, concomitantia et consequentia vulgo elucidatur.

1°. Præire solet circumstantia quædam individua aut hygienica , morbus scilicet anterior , generalis aut localis , etc. quem ægra sæpe confitetur.

2°. Uteri scirrhoma raro solum , sed aliâ vulgo infirmitate stipatum pathologi memorant. Tunc languere mulier , sæpeque labi in pejus , menstrua , mictus , alvi dejectio non ut sanis ; uterina cervix plerumque mutata , quasi extravessa , infundibuliformis ; molestari , dolere lumbi , inguina , femora.

3°. Hic morbus perennare , mox in horrendum cancrum degenerare , tandem mulierem pessundare.

Quæ profectò malorum cohorta genuinâ graviditate procul abesse peritas non latet obstetrices. Insuper , qui circâ medium veræ prægnationis spatium in utero manifestantur infantuli motus hunc ab aliâ re quâcumque secernunt.

GENUS SECUNDUM.

De spuriis , quæ a mutata uteri appendice , graviditatibus.

Uteri appendices , præsertim ovaria et fallopianæ tubæ , mutari et degenerare non unico probatur extispicio. Quæ organa aliquando itâ induruerunt ut cultelli aciem obtunderent , tantamque molem acquisiverunt ut teste celeberrimo *Morgagni* viginti librarum pondus æquarent. Sexaginta amurcosi liquidi libras in sinistro ovario incarceratas memoret peritissimus *Douglas*. Alii calculos , pilos , dentes , capillos , ossaque ibi invenerunt : quæ omnia ad ovariorum scirrhoma hydropemque contrahemus. Hinc duplex spuriæ graviditatis species.

SPECIES PRIMA.

De spuriâ , quæ ab ovariorum scirrho , graviditate.

Hanc ovariorum degenerationem crebrius apud innuptas quam apud maritas , sæpiissime apud mulieres sæcunditate menstruisque defunctas observari plurima exempla docent. Cujus autem causa , eadem quæ uterini scirrhomatis , nisi assignanda , saltem conjectanda est.

Exordiente morbo, tumor in alterutro vel utroque hypogastrii latere, exiguus, profundus, sensus quasi expers, tactum fugiens, distinctaque difficillimus, lente progrediens, stationarius, perennis.

Elapsis verò pluribus paucioribusve annis, adaueta uteri moles in suo loco prominet; tunc verò facilius rem discriminare solet medicus in obstetricio versatus, si ad vaginæ fundum et ad uterinæ cervicis latera digitum admoverit.

Interea tumor irritari, dolere, inflammari; inde non naturalis affecti organi cum vicinis adhæsio; inde abscessus quorum materia in abdominis cavum sese exonerare, aut per intestinum, vaginam, hypogastrii integumenta, demum quā datus exitus fluere solet. Quidam, rari tamē, referuntur casus in quibus stupendae molis ovaria triginta per annos, illæsis ægræ rebus steterunt. Quinimò, vix credibile! cum scirrhoma alterutri tantum lateri insideret, mulier pluries concipere, prægnare et parere potuit.

Ardua igitur et difficilis præsertim ab exordio hocce malii genus inter et graviditatem differentia; itaque expectanto obstetrices, donec a falso verum secernere queant. Tunc diagnosis potissimum ovarii incremento, non mutatis uteri mole et formâ sed aliquando situ, volvitur. Insuper considerare oportet quæ causa præcesserit, quæ symptomata concomitant, quænam præsertim morbi perennitas et finis. Hæc ne minimum quidem cum genuinâ graviditate habent analogiam.

Ovarii scirrhoma, saltem non irritatum aut inflammatum, plus molestiæ quam periculi habet; ergò non tangendum est. In hoc omnino seduli sunt medici ut, nisi prosint, saltem non noceant. Quamobrem salubria hygienes auxilia invocant; plerumque nociva, semper inutilia pharmaca procul amoventor.

S P E C I E S S E C U N D A.

De spuriâ, quæ ab ovarii hydrope, graviditate.

Hic morbus præcedentis affinis, vulgo comes aut pedissequus est; cui ovarium plurimis vesiculis sero plenis, cellularique telâ internexis

conflatum, necnon propria meninge peritonæoque obductum prædisponi solet.

Undenam autem incarceratus ovarii hydrops? Undique hic ambages, undique conjecturæ; eadem forsitan quæ scirrhomatis causa: sed ad certiora properandum est.

Ab exordio, tumor in utroque alterutrove hypogastrii latere exigus, circumscriptus, minimè dolens, profundus, ideòque parum vel nullatenus tactu facilis; quo nondum perturbantur mictus, alvi secessus, menstrua.

Progrediente morbo, tumor in dies lentè tamen crescere, vacillare, ad declivia procumbere; tunc obtusus continuusque dolor, gravitatis sensus ad inguen, ilium, coxam, ejusdemque lateris membrum proserpens.

Interjecto dein longiori aut breviori tempore, vicina organa repelliri, comprimi, irritari, inflammari, mutari; hinc ovarii cum remotis adhæsio, abdominalium viscerum distractio, uteri depresso, deviatio, coxae, inguinis, vicinique femoris œdemata, abdominis inæqualitas, quandòque liquidi fluctuatio.

Tandem integra abdominis repletio, ventriculi, hepatis, diaphragmatisque repulsio, digestionis, respirationis, circulationis, etc. alteratio; hinc consumptio, quandòque kysti ruptura, morsque propera.

Ergò liquidum est quānam periodo ovarii hydrops uterinam aut extra-uterinam graviditatem simulare, quānamve ab utraque secerni possit. Ineunte morbo, res in ancipiū hærere, progrediente verò, elucidari, tandem proiecto, oculos percellere. Hanc autem unicam diagnoseos anchoram memoriter tenento practici, genuinam scilicet non adesse graviditatem quoties idem servatur uteri status nullique percipiuntur foetuli motus.

Quod ad prognosim et curationem, idem fere ac scirrhomatis; ovarii hydrops, salvâ muliere, imo non amissâ concipiendi pariendique facultate, medio fere sæculo perennasse legitur. Medicamenta ergo nulla aut pauca sed innocua dantor; hygiene mulieri sufficit. Si tumor tantum molis acquirat, ut suffocationis periculum immineat, triquetra

acu pertunditor. An et quando ovarii incisio et extirpatione? Hæc ad chirurgiæ peritissimos.

GENUS TERTIUM.

De spuriis, quæ ab abdominis mutatione, graviditatibus.

Morbificæ abdominis mutationes sexcentæ quarum præcipuæ et frequentissimæ ascites, tympanites, sanguinis aut puris collectio, mesenterii tumor, scirrhoma, atheroma, etc.; verùm, ne prolixius, paucis tantummodo de ascite et tympanite dicendum superest.

SPECIES PRIMA.

De spuria, quæ ab ascite, graviditate.

Ascitæ causa, prognosis et curatio ad medicos et chirurgos, diagnosis autem ad obstetrices, saltem in fæmineo sexu, cum morbus ad genuinam graviditatem similitudinem habet. Sequentia verò manifestum discrimin faciunt.

1º. Ascites morbus est vulgò chronicus, sæpe acuti sequela aut effectus, in quo tumor abdominis ab imo sursum non mutato utero crescit, ad latera difflit, fluctuante liquido repletur, tandem viscera comprimit, macerat, ægramque pessundatam enecat.

2º. Genuina graviditas naturalis propriusque mulieris status est in quo uterus, vigente adhuc fæcunditate, post conceptionem, per novem menses, in ovatum, renitentem, antrorsùm prominentem, mobiliique fœtulo plenum tumorem distenditur.

SPECIES SECUNDA.

De spuriâ, quæ ab abdominali tympanite, graviditate.

Quæcumque de ascite hæc fere de tympanite dici possunt, si tamen percussi tumoris sonitum, levitatem, majorem renitentiam, circumscriptiōnem, atque fluctuationis absentiam excepēris. In præsenti non secus ac suprà, qui non mutatur uteri status, firma est quâ diagnosis fundatur anchora.

C O N C L U S I O.

Supra memoratis attentam quisquis mentem adhibuerit, huic procul dubio varias spuriæ graviditatis species, præsertim inter se implicatas, haud extricatu faciles esse persuasum erit; neque tamen quæstionis solutionem omnino in desperatis positam existimet. Arctis quidem et intortis ab exordio nexibus illaqueatur, quod iisdem ideoque incertis et æquivocis tum genuinæ cum spuriæ graviditatis initia phænomenis stipari soleant; elapsis verò mensibus aliquot, a vero falsum secernere, tantæ molis non esse monent practici. Tunc enim perennibus aut mutatis uteri situ, formâ, mole, et obscuris aut manifestis fœtuli motibus ariadneum appenditur filum quo resolvi ambages cæaque vestigia plerumque regi solent. Quemcumque igitur, dum veritas illuxerit, expectare non tædet, is præfecto rarius a recto tramite aberrans pluribus mulieribus fœtulisque profuturus erit.

Quasdam autem, pro temporis angustia, uteri, aut ejus annexorum aut abdominis mutationes, unde aliæ spuriæ graviditatis species derivari possent lubenter omisimus. Sed quæ in hoc opusculo desiderantur ea fusius explanata legi poterunt in tractatu de morbis mulierum quem jam typis mandaturi sumus.

ERRATA.

- Pagina 12, linea 5,* in pejus, *lege* in pejus;
- ib.* 11, quæ profectò malorum cohors *lege* quam profectò malorum cohortem
- 14, 6, exigus *lege* exiguus
- ib.* *ultima*, triquetro acu *lege* triquetrà acu

ΕΠΙΓΡΑΦΗ.

Η^ρ δὲ κρίσις χαλεπή.... Κρίνεσθαι δε χρὴ τῷ πληρόματι· καὶ ὁ, τι δού κινέιται
ἐν τῇ γαστρί. Τὸ μὲν γὰρ ἀρσεν, τρίμινον· τόδε γε θῦλυ, τετράμινον τὸν κίνησιν
ἔχει. Επὶν οὖν τῷ χρόνῳ παρελτόντος μὴ κινέιται, δηλόν ὅτι τοῦτο εῖσι. Τόδε τὸ
τεκμήριον μέγα ἐν τοῖσι τιτθοῖσι γάλα οὐκ ἐγγίνεται.

ΙΠΠΟΚΡ. Περὶ γύναικες.